

лукнила стилити белгидирниличи, лугъатуначила имцѣли тѣинтѣи баянти дурчнеличи дурхѣнала пикри битѣакѣни къулайсилизи халбирули саби.

Ишди программабани халаси пикри бяхѣчиули саби практический хѣянчурбачи, чузирра вархѣли лукнила, гѣайикѣнила, багълабирнила ишараби кадалтѣнила масъулти имцѣли мурхѣли ва гѣатѣира чедетаахѣли ирзутѣи.

Программабала гѣарил тема кѣл бутѣализибад цѣлабикибси саби. Цѣибил бутѣализиб чебаахѣли саби, делчѣунтира цѣзаманализир тикрардирули, теориялашалти багъудлума мурхѣдарес ва тѣинтѣидарес. Кѣибил бутѣализиб практикалашалти устадеш чеахѣдикѣахѣс ибси масъала тѣашбалтули саби.

Чидни-биалра темаби къяндулхѣули диалли тикрардирнилис чедѣаахѣбти сягѣятунѣи учительлис къяндулхѣутѣи темабас яра белкѣла хѣянчурбас пѣйдаладарес вирар.

Тѣп илкѣяйда учительла ихтиярлизир далтутѣи сари 11 ибил класслизирра тикрардирнилис чедѣаахѣбти сягѣятунѣи.

Учительлизиб ихтияр лебси саби бучѣантани цѣ тема гѣамадли иргѣули биалли, илис чедѣаахѣбти сягѣятунѣи камдарили, цархѣилти имцѣли къяндулхѣутѣи темабас харждарес.

Белчѣудѣла план хѣясибли, дарган мезлис ва литературалис чедѣаахѣбти сягѣятунѣи ишкѣяйда дуртѣи :

Классуни	Жумягѣлизир сягѣятунѣи	Дарган мезлис	Литературалис
5	4	2	2
6	4	2	2
7	4	2	2
8	4	2	2
9	4	2	2
10	3	1	2
11	3	1	2

Ишди программаби бегѣ гѣалар дурадѣхѣунтири 1992 ибил дуслизир. Кам-гѣамти дарсдешуначил гѣанна сагадан (хѣяйнайс) кадѣахѣбти сари.